

FINAMIRAS DAL CHANTUN GRISCHUN

PER LA REPOWER SA (FINAMIRAS DA PROPRIETARI)

concludidas da la Regenza ils 21 da december 2021 (conclus nr. 1095/2021)

1. SITUAZIUN DA PARTENZA

1.1 Politica d'electricitad dal chantun Grischun

Sco interpresa d'energia grischuna independenta ch'è activa sin plaun naziunal ed internaziunal presta la Repower SA ina contribuziun essenziala en l'interess da la politica d'electricitad grischuna, en spezial per la segirezza dal provediment. Ella ha ina impurtanza decisiva per l'economia publica, per las finanzas e per la politica regiunala dal chantun e da las vischnancas grischunas.

1.2 Relaziuns da participaziun e gruppa d'acziunaris en l'acziunariat

L'acziunariat da la Repower SA sa cumpona dals quatter acziunaris principals:

- Ovras electricas dal chantun Turitg (EKZ) 34,04 pertschient
- Chantun Grischun 21,96 pertschient
- UBS Clean Energy Infrastructure KGK (UBS-CEIS) 18,88 pertschient
- Axpo Holding SA (Axpo) 12,69 pertschient

Ils ulteriurs 12,43 pertschient da las aczias èn en mauns da differents acziunaris publics. Avant 5 onns importava la participaziun da las EKZ 28,32 pertschient. Cumpareglià cun las relaziuns da possess da quella giada è questa participaziun s'augmentada per stgars 6 pertschient, quai sin donn e cust dals acziunaris publics.

Ils quatter acziunaris principals èn colliads cun in contract d'obligaziuns per acziunaris (COA). Els vulan cuntanscher ina relaziun collegiala ed ina finamira cuminaivla per l'interpresa Repower SA. Tranter auter èn els sa cunvegnids a las suandantas basas:

- sco finamira suprema duai la Repower SA esser ina interpresa grischuna independenta, da l'economia privata, manada tenor princips da l'economia da manaschi, cun finamira da rendita e cun ils martgads centrals Svizra ed Italia;
- da princip duai il chantun agir en il senn da l'agen urden giuridic e da conclus legitimads democraticamain e resguardar – en il rom da la politica d'electricitad – er ils interess da las vischnancas grischunas.

1.3 Public corporate governance

Per la participaziun dal chantun a la Repower SA fixescha la Regenza finamiras da proprietari individualas, per ademplir optimalmain – en il rom da sia cumpetenzza – sias incumbensas e sia responsabladad en l'interess dal chantun sco in dals quatter acziunaris principals. Ella fa quai en accordanza cun ils dretgs e cun las obligaziuns tenor il contract d'obligaziuns per acziunaris da la gruppa d'acziunaris e resguarda ils dretgs da terzs acziunaris.

Correspondentamain ha la Regenza l'intenziun da stgaffir premissas optimalas per il chantun e da garantir la trasparenza en chaussa, per che la Repower SA possa exister er vinavant

cun success sin il martgà sco interpresa grischuna integrada verticalmain cun ina impurtanza decisiva per la politica da provediment, per l'economia publica, per las finanzas e per la politica regionala dal chantun e da las vischnancas grischunas.

En l'interess dal chantun e da las vischnancas grischunas, mintgamai sco unitads territorias, resguarda la Regenza – ultra da l'interess dal chantun sco acziunari principal en spezial areguard ils implants da producziun d'electricidad cun forza idraulica sin il territori chantunal – er las finamiras fixadas uffizialmain tenor la Strategia grischuna da forza idraulica 2022–2050.

2. PUNCTS CENTRALS STRATEGICS E FINAMIRAS

La Regenza spetga che la Repower SA realiseschia consequentmain la nova orientaziun strategica, deliberada dal cussegl d'administraziun e sustegnida dals acziunaris principals, sco ch'ella è vegnida communitgada ils 18 da december 2015 resp. ils 30 da matg 2016.

En quest connex spetga la Regenza particularmain, che la Repower SA

- vegnia manada tenor princips da l'economia da manaschi, possa realisar in success economic en l'economia d'energia e creschia ina plivalur per las proprietarias ed ils proprietaris;
- procura per ina ferma basa e francaziun en il chantun Grischun e stgaffeschia premissas optimalas per laschar participar il chantun e las vischnancas grischunas a l'entira chadaina da valurisaziun da l'economia d'energia;
- exaureschia optimalmain ils potenzials da producziun che derivan da la forza idraulica e ch'èn avant maun, tras in'utilisaziun economicamain ed ecologicamain responsabla e prestia uschia ina contribuziun al provediment d'electricidad observond las finamiras e las strategias da la politica d'energia dal chantun e da la Confederaziun;
- investeschia da nov en la producziun d'energias regenerablas resguardond ils systems da promoziun mintgamai vertents e prestia uschia ina contribuziun al provediment d'electricidad, quai cun tegnair quint da las finamiras e da las strategias da la politica d'energia dal chantun e da la Confederaziun;
- orienteschia la producziun d'electricidad indigena dal tuttafatg als purtaders d'energia regenerabels ed exequeschia en moda consequenta e svelta, en spezial las dischinvestiziuns annunziadas da las participaziuns a l'energia nucleara;
- garanteschia in provediment d'electricidad segir e cumpetitiv en ses territori da provediment;
- garanteschia ina commercialisaziun optimala da l'energia producida cun duvrar ils instruments e las pussaivladads dals martgads d'electricidad;
- rinforzia – en ils secturs da la producziun, dal commerzi, da la distribuziun e dal provediment d'electricidad – sia posiziun sin il martgà sco interpresa d'electricidad integrada verticalmain e sustegnida la diversificaziun da las ristgas;
- nizzegia consequentmain las schanzas en il sector dals servetschs, per acceder a singuls novs secturs da fatschenta cun l'intent da sviluppar vinavant cun cleras finamiras il model da fatschenta ed er per gidar a diversifitgar las ristgas.

La Regenza spetga plinavant che la Repower SA

- rinforzia la coordinaziun tranter Swissgrid e l'agen manaschi sin il nivel da rait 3 per garantir la segirezza dal provediment sco er la stabilitad da la rait a curta ed a media vista;
- sa fetschia valair sco partenaria dal chantun e da las vischnancas grischunas en il rom da la realisaziun da la Strategia grischuna da forza idraulica 2022–2050.

La Regenza spetga ultra da quai che la Repower SA resguardia – concernent la persistenza – l'equiliber tranter ils aspects economics, ecologics e socials e tegnia quint dals svilups giuridics e socials en tut sias activitads.

La Regenza spetga la finala che la Repower SA resguardia sufficientamain sia relevanza per la politica da provediment, per l'economia publica, per las finanzas e per la politica regionala dal chantun e da las vischnancas grischunas.

3. FINAMIRAS FINANZIALAS

La Regenza spetga che la Repower SA

- cuntanschia in augment da la valur da l'interpresa cun sia activitad;
- realiseschia per ils acziunaris ina rendita da dividendas usitada en la branscha;
- procura per ina finanziaziun stabila cun ina quota d'agen chapital solida;
- garanteschia – tras in'activitad d'interpresa equilibrada – in profil da ristgas finanzialas adequat.

4. FINAMIRAS DIRECTIVAS

La Regenza spetga che la Repower SA

- garanteschia ed applitgeschia – sin il plaun directiv strategic – tut las cumpetenzas necessarias per definir e per far valair la strategia da l'interpresa en il senn d'in svilup persistent da l'interpresa;
- disponia – sin il plaun directiv strategic – da tut las cumpetenzas necessarias per concepir e per realisar la strategia da l'interpresa;
- respectia il princip da la libertad da votaziun da tut las represchentantas e da tut ils represchentants dal chantun en il cussegl d'administraziun da la Repower SA;
- garanteschia il tractament equal dals acziunaris en lur posiziun e concepeschia ina relaziun gista cun ils acziunaris principals en il rom da las cundiziuns usitadas dal martgà e da la concorrenza;
- sa cumportia envers sias collavuraturas e ses collavuratur sco patruna sociala che agescha cun responsabladad.

5. VALAIVLADAD E MIDADA

En cas da basegn e tar mintga midada da la strategia da l'interpresa che sto vegnir deliberada dal cussegl d'administrasiun vegnan las finamiras da proprietari examinadas da nov ed eventualmain adattadas en mintga cas, il pli tard dentant il 3. quartal da l'onn 2025.